



Kamis, 30 November 2023

Ogen: Matius 7:15



Metengetlah



W Nurung kerah e pe pikpikkenlah dengen tutung ulihi sope denga itanggerken" nina bapa Jore man anakna. Kata enda ibelaken guna mpersingeti Jore sope denga berkat erlajang ku kuta si ndauh. Tersungkun-sungkun pusuh Jore kerna kata sinibelasken bapana e, e maka mulihi isungkunna kerna antusen kata e. Ituriken Bp. Jore maka kegeluhen i bas perlanjengan, erbage-bage si man alanken. Banci jadi enterem nge kari jadi teman entah kandu-kandu Jore i je. Tapi prinsip geluh si arus igelem kerina si reh e arus itengeti. Ula mesunah tek, tapi metengetlah. Sebab bali ras nurung kerah si enggo ikerahken. I bas nggulesa arus lebe ipepekken segelah binatang-binatang kitik si lit entah si leket ibassa banci ndabuh, la terjeng si e itutung entah idiang-diang segelah kuman e banci mate. Kenca si e maka itanggerken. Bage me pe bas kegeluhen arus tetap metenget, i bas kegeluhen segelah la mesunah terpengaruh tapi banci mejuah-juah.

Tuhan Jesus mpersingeti kalak si megiken kotbah sinibelaskenna "metengetlah." Melala kal nabi-nabi perguak i sekelewet. Teridah bagi biri-biri si melemuk, tapi situhuna ukurna bagi serigala. Biri-biri e me binatang si melemuk, semalna ijadiken jadi persembahen. Tapi kinatana serigala si merawa, dengen siap guna ngelukai kalak sideban. E maka ula tampilan darat saja iperdiateken tapi nehenlah pusuhna. Kata enda pe arus tetap lit i bas kegeluhenta si teptep wari. Genduari kegeluhen "dunia maya" melala teridah melikas, mehuli tapi situhuna murde ras encedai. Mbue penipun-penipun si ipake alu cara lemah lembut. Upamana genduari melala kal si make akun gelar teman-temanta, bahkan akun pendeta, si atena mbeneken. Ikirimna undangan-undangan kune sibuka maka datanta ipakena guna nipu kalak sideban. Wari enda iperingeti wari keamanen komputer internasional. Pentar makeken dengen jaga keamanen IT sinipakeken kita.

